

(217)

**1387-IX-22. Segovia.— Carta de Juan I ordenando no entreguen maravedís alguno a cuenta del sueldo a Guillermo de Fontanas. (A.M.M., C.R. 1384-91, Fol. 149, v.-150, r.)**

Don Johan, por la graçia de Dios, rey de Castiella, de Leon, de Portogal, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Lara, e de Vizcaya, e de Molina, a los conçeios, e alcalles, e ofiçiales, e omes buenos de las çibdades de Murçia e de Cartajena e sus terminos, e de la villa de Lorca con Aledo, e a qualquier o a qualesquier de vos a quien esta nuestra carta fuere mostrada, o el treslado della signado de escrivano publico, salut e graçia. Bien sabedes en commo por nuestras cartas son libradados en vos, en los maravedis que nos avedes a dar de las alcavalas e seys monedas este año de la data desta, a Guillem de Fontanas, çiertas quantias de maravedis que ovo de aver en cuenta de su sueldo deste año e que los paguedes desde primero dia de enero fasta en fin del mes de dezienbre deste dicho año, en cada mes desque fuese conplido çiertas quantias de maravedis.

E agora sabet que es nuestra merçed de mandar fazer cuenta con el dicho Guillelmo de Fontanas, asi del sueldo que ovo de aver, commo de los maravedis que tiene resçevidos. Porque vos mandamos que los maravedis que fincan en vos que le non avedes pagado de los meses pasados, e los maravedis que le avedes de pagar deste mes de setienbre en que estamos, e de los meses que son por venir en adelante, fasta en fin del dicho mes de dizienbre deste dicho año, que le non paguedes cosa alguna fasta tanto que ayades nuestra carta sobre ello. E enbiadnos dezir luego quantos son los maravedis que le avedes pagado, por quanto el dicho Gullelmo de Fontanas dize que de los maravedis que le oviestes a dar de los meses que son pasados, que fincan en vosotros que le non pagastes una quantia de maravedis. E non fagades ende al por ninguna manera, so pena de la nuestra merçed, porque asi cunple a nuestro serviçio.

Dada en la çibdat de Segovia, veynte e dos dias de setienbre, año del nasçimiento del nuestro salvador Jhesuchristo de mill e trezientos e ochenta e siete años. Yo, Ferrand Beltrand, la fiz escrivir por mandado de nuestro señor el rey. Juan Ferrandez. Johan Martinez.

